

20 JUN 2003

SESI PERBAHASAN PERHIMPUNAN AGUNG UMNO KE-54 MASUK HARI KEDUA

KUALA LUMPUR, 20 Jun (Bernama) -- Sesi perbahasan usul terima kasih atas ucapan dasar Presiden pada Perhimpunan Agung Umno kali ke-54 disambung semula hari ini, hari kedua persidangan di Pusat Dagangan Dunia Putra (PWTC) di sini.

Perbahasan disambung oleh baki empat lagi wakil negeri dan seorang wakil Kelab Umno.

Wakil Wilayah Persekutuan, Datuk Tengku Adnan Tengku Mansor memulakan perbahasan kira-kira pukul 8.30 pagi, disusuli Pengerusi Badan Perhubungan Umno Johor Datuk Abdul Ghani Othman, Pengerusi Badan Perhubungan Umno Perak, Datuk Seri Tajol Rosli Ghazali, Pengerusi Badan Perhubungan Umno Pahang Datuk Seri Adnan Yaakob dan wakil Kelab Umno Mohamad Nazari Ahmad.

Sesi perbahasan itu ditangguhkan pada pukul 6.45 petang semalam setelah lapan wakil negeri yang terdiri daripada pengerusi atau timbalan pengerusi badan perhubungan selesai menyampaikan ucapan perbahasan masing-masing.

Dua lagi usul iaitu usul ekonomi dan pendidikan/agama akan dibentangkan serta dibahaskan hari ini.

Lebih 2,000 perwakilan Umno daripada 165 bahagian seluruh negara menghadiri persidangan itu yang berakhir esok.

Persidangan kali ini merupakan yang terakhir bagi Datuk Seri Dr Mahathir Mohamad yang akan melepaskan jawatan presiden parti dan Perdana Menteri Oktober ini.

-- BERNAMA  
RAR KHY ROS